

四庫全書

集部

欽定四庫全書

集部

雁門集卷三

詳校官監察御史臣曹錫寶

中書臣劉源溥覆勘

總校官編修臣王燕緒

校對官庶吉士臣陸伯焜

謄錄監生臣王士傑

欽定四庫全書

雁門集卷三

元 薩都拉 撰

過紫微菴訪馮道士

道士愛幽居年來一事無
盆池新過雨石上種菖蒲

又

山中華蓋洞石氣冷蕭蕭
不見眠雲客惟逢避雨樵

又

研珠滴露清自點太玄經盡日無人到小窓蘭葉青
雪霽過清溪題道士江野舟南館

孤舟橫野水門外雪晴初白日莫放鶴青溪間釣魚

又

江南正月半猶自有梅花踏雪去何處青溪道士家

過高郵射陽湖雜詠

飄蕭樹梢風淅瀝湖上雨不見打魚人菰蒲雁相語

又

秋風吹白波秋雨鳴敗荷平湖三十里過客感秋多

又

野鶴如人長迎風理毛羽獨立秋雨涼人來忽飛去

又

雨濕鼓聲重風勻湖面平官船南北去帆影掛新晴

又

白鷺愛秋水獨立仍自行得魚固偶爾鷺飛亦常情

又

秋水落紅衣秋波日瀟灑不見採蓮人惟逢捕魚者

又

霜落大湖淺漁家懸破罾此時生計別小艇賣秋菱

又

捕魚湖中水賣魚城市裏夫婦一葉舟白頭共生死

又

大罾一丈濶小舟一葉輕相傳子與孫終古無人爭

病中雜詠

十日九風雨深秋獨閉門積陰須自散倚杖望朝暾

又

為客家千里思歸月滿樓木樨開欲盡病裏過中秋

又

門繫青驄馬多應問病人小官好疎散莫訝嬾衣巾

又

病形如瘦鶴照影向清池自有冲霄志游魚莫見疑

又

風葉高下落秋砧遠近聞天涯多病客倚杖看孤雲

又

陶令貧無酒郎言菊也無家僮燒柿葉隣舍送茱萸

又

多病東廳客深秋出幕遲芙蓉開也未葉上好題詩

次韻與德明小友

煙雨短篷水口人家亂石山前送別莫忘今日相逢知
在何年

又

莫笑風飡水宿暫離馬足車塵兩岸好山送客一江細雨歸人

舟中題畫卷

兩岬好山如畫丹崖翠壁樓臺愛殺南閩風景小官何日歸來

雪中渡江過山飲暘谷簡上人房

聞說山中新酒熟野人乘興過江來小牕無處看春色

一樹梅花雪裏開

又

山酒吹香出小槽
燈前痛飲污青袍
夜深夢醒知何處
老鶴一聲山月高

京口城南次集

野薺花開春欲盡
山櫻子落雨初晴
酒醒騎馬踏花去
門外綠陰無數生

又

雨深綠葉櫻桃肥日長青草蝴蝶飛江南三月春欲盡
白馬王孫遊不歸

憩奉真道院

落花風颺步虛聲翠草玄芝爛漫生過客不知春早晚
午窓晴日睡聞鶯

對客

石榴花開光照屋胡桃葉大陰滿簾焚香終日對客坐
時有白雲來纖纖

過揚州

買舟南浦秋間雁呼酒西窓夜剪燈何處玉簫天似水
瓊花一夜白如冰

宿淮南長蘆寺

柳花漠漠春歸寺蘆葉青青晚渡江屋角松聲撼風雨
道人一夜不開牕

宿化閣渡口阻風

江船日午無人渡渡口人家盡不曾却憶吳姬新壓酒

鍾山對岸是金陵

又

艇子渡江何日迴
石頭城下浪如雷
淮南春色知多少
一樹櫻桃帶雨開

又

客船伐鼓春江暮
水面魚龍出浪花
今夜石頭城下泊
買魚沽酒向誰家

瓜州阻風

渡口無人上野航
白頭危浪自衝撞
東風三日不肯住
吹送柳花飛渡江

題界首驛

清氣撲人湖面水
幽聲到耳樹頭風
人家蠶老櫻桃過
恰似淮南四月中

又

平湖過雨天開鏡
落日放船人打魚
野老柳陰沽秫酒
行人馬上寄家書

渡淮即事

楊花點點衝帆過
燕子雙雙掠水飛
淮上漁人聞不得
船頭對結綠蓑衣

西宮即事

九重五色金銀闕
冠帶將軍盡羽林
白髮儒生才進講
西宮午漏隔花深

又

退朝西殿承平日
一片春雲奏鳳笙
白面內官供玉食

却將黃帕覆銀鐙

還臺偶成

高低柳絮飛渡水紅白桃花開滿枝
自笑江南無用客
一春無事只題詩

又

踏雪歸來過早春
沉沉臺府隔紅塵
東風吹綠青溪柳
馬上輕寒不著人

題治城道士稽秋山卷

不見冶城稽道士雲深無處訪仙蹤
夜聞老鶴行枯葉知在秋山第幾重

余與觀志能俱以公事赴北舟至梁山泊時荷花
盛開風雨大至舟不相接遂泊蘆葦中余折蘆一
葉題詩其上寄志能

題詩蘆葉雨斑斑底事詩人不奈閒
滿樂荷花開欲遍客程五月過梁山

春詞

深宮盡日垂珠箔
別殿何人度玉筍
白面內官無一事
隔花時聽打毬聲

秋詞

清夜宮車出建章
紫衣小隊兩三行
石闌干畔銀燈過
照見芙蓉葉上霜

上京即事

一派簫韶起半空
水晶行殿玉屏風
諸工舞蹈千官賀
齊捧蒲萄壽兩宮

又

上苑棕毛百尺樓
天風搖拽錦絨鈎
內家宴罷無人到
面面珠簾夜不收

又

行殿參差翡翠光
朱衣花帽宴親王
繡簾齊卷薰風起
十六天魔舞袖長

又

中官作隊道宮車
小樣紅靴踏軟沙
昨夜內家清暑宴

御羅涼帽插珠花

又

大野連山沙作堆
白沙平處見樓臺
行人禁地避芳草
盡向曲闌斜路來

又

院院翻經有呪僧
垂簾白晝點酥燈
上京六月涼如水
酒渴天廚更賜冰

又

祭天馬酒洒平野沙際風來草亦香白馬如雲向西北
紫駝銀甕賜諸王

又

牛羊散漫落日下野草生香乳酪酣卷地朔風沙似雪
家家行帳下氍毹

又

紫塞風高弓力强王孫走馬獵沙場呼鷹腰箭歸來晚
馬上倒懸雙白狼

又

五更寒襲紫毛衫睡起東窓酒尚酣門外日高晴不得
滿城濕露似江南

再過梁山泊有懷觀志能

故人同出不同歸雲水微茫入夢思記得題詩向蘆葉
滿湖風雨似來時

又

燈火官船夜睡遲滿湖風露襲人衣無端驚起沙頭雁

明月蘆花各自飛

邵伯舟中

驚魚時出浪花雪
短鬢涼吹水面風
遠客行船秋色裏
誰家吹笛月明中

題京口高資包氏壁

肩輿曉踏新晴出
山色青青上客衣
昨日千林風雨過
滿田白水鷺鷥飛

贈茅山道士胡琴月

茅山道士來相訪手抱七絃琴一張準擬月明彈一曲
桐花落盡曉風涼

送鏡中圖上人遊錢塘

西湖西畔三天竺古木蒼藤望欲迷遙憶道人禪榻夜
月高霜落聽猿啼

過贊善菴

夕陽欲下行人少落葉蕭蕭路不分脩竹萬竿秋影亂
山風吹作滿窓雲

雲中過龍潭紫微觀訪道士不值

道人已跨龍潭鶴
童子能煎雀舌茶
一夜山中滿林雪
客來無處覓梅花

將遊茅山先寄道士張伯雨

借騎白鶴訪茅君
琪樹秋聲隔夜聞
料得山中張外史
開門先掃鶴巢雲

登衆妙堂題商學士畫雨霽歸舟圖

大茅峯頂見日出
烟樹雲林宿雨收
萬里澄江淨如練

却從天際識歸舟

紫微觀道士馮友直與予同宿苗閣次日予過元
符宮友直同僧安上人過五雲觀寫詩贈友直

道人采藥出山遲
菌閣秋寒襲羽衣
半夜忽聞孤鶴語
五雲相伴一僧歸

同伯雨遊凝神菴因觀宋高宗賜蒲衣道士張達
道白羽扇

晴日赤山湖
水明湖中山影一眉青
蒲衣道士無人識

羽扇年多落鳳翎

茅山玄洲精舍有道士號紫軒又號木通生白日
坐解遺書其徒許道民者至今坐牆尚存為題其

卷

白日飛昇凌紫烟靈書猶許道民傳玄洲精舍無多地
夜夜火珠光燭天

同御史王伯循時除廣東僉事濟揚子江余除燕
南照磨

落葉正飛揚子渡行人又上廣陵船過江載得秋多少
老雁一聲霜滿天

九日渡淮喜東南順風

青旗紅字映河濱九日人家物色新渡口客船爭貰酒
斫魚列紙賽河神

又

東南風送渡淮船過雁聲寒水接天落日紅霞收未盡
澹雲微月出東邊

春日鎮陽柳溪道院

城外青溪出洞門道人歸去日長曛
柳花滿地無人掃隔水遙看是白雲

過鎮陽城南觀音院

柳色暗藏溪上寺露華偏濕水邊僧
門前天暝荷花滿出水遊魚夜戲燈

寄奎章學士濟南李溉之

山東李白似劉伶投老歸來酒未醒
天下三分秋月色

二分多在水心亭

又

笑擲金龜上酒船
不須圖像在凌烟
碧羅衫色烏紗帽
便是開元李謫仙

過獻州

西風老樹昏鴉集
落日荒城暗雨崩
寂寞斷碑秋草裏
路人遙指獻王陵

補題淮西送王仲和從事詩卷

百年馳馬苦匆匆
水落烏江楚廟空
眼底山川猶歷歷
淮南舊夢雨聲中

題李漑之送別詩卷

清平三曲動明皇
四海知名李白狂
把酒探春送行客
揮毫字字柳花香

將入閩趙郡崔好德求題輿地圖

月輪西轉日生東
四海車書總會同
騎馬出門天萬里
山川長在別離中

黃河舟中月夜

十丈雲帆拂斗杓，星槎風急浪花飄。
夜深露冷銀河近，臥聽天孫織絳綃。

阻風南露筋過羅漢寺登樓看山茶

野寺尋春酒未醒，不知幾日過清明。
小闌干外東風急，一樹山茶落晚晴。

夜宿金山題金山閣

遠人夜宿金山寺，坐對畫圖如夢中。
剪燭題詩雲氣裏，

不知身已在龍宮

春日過丹陽石仲和宅會茅山道士石山輝

杏花一夜雨聲寒酒醒丹陽幾日還
却遇茅君三白鶴借騎一隻到三山

登姑蘇臺

閶門楊柳自春風水殿幽花泣露紅
飛絮年年滿城郭行人不見館娃宮

又

野水滿城飛燕子
誰家小艇載吳姬
姑蘇臺上一樽酒
落日昏鴉無限悲

入閩過平望驛和御史王伯循題壁

廣陵城裏別匆匆
一去三山隔萬重
日暮江東寄相憶
欲臨秋水剪芙蓉

宿長安驛

壩北壩南河水平
客船爭纜水雲腥
鄉音吳越不可辨
燈火黃昏如亂星

又

水面微風動楊柳客船吹笛月明中
遠人江海多歸思
卧看流星度水東

釣臺夜興

仙茶旋煮桐江水坐客遙分石壁燈
風露滿船山月上
夜深獨對釣臺僧

早發釣臺

山頭鐘響不聞雞重露翻翻鵝滿樹
啼艇子釣臺東畔發

月輪却在釣臺西

蘭溪舟中

水底霞天魚尾赤
春波綠占白鷗汀
越船一葉蘭溪上
載得金花一半青

泊江家步無月同孟志學小酌溪上

把酒無從邀月色
共君且復聽灘聲
夜深燈影青溪上
魚尾搖船亦有情

又

蘭溪春水似蒲萄
越女如花壓小槽
今夜共君溪上醉
直須溪月照宮袍

黃亭驛曉起

積雨莓苔上壁青
曉寒山館夢初醒
鷓鴣聲裏流年渡
自是行人不忍聽

和經歷楊子承曉發山館

夢回山館月西斜
曙色千峯動紫霞
杜宇一聲山竹裂
鷓鴣飛上野棠花

石林即事

三山幕府無公事多病郎官嬾出門
老鶴喚迴童子睡石盆新雨長蘭蓀

又

蒲扇屏山紫竹牀嶺南五月似秋涼
硯池風動雲生石簾外雨蘭吹濕香

題屏風

海國夜涼星亂垂石林逋客未眠時
滿簾月色吹輕霧

白露無聲下竹枝

獨坐恭和堂

東閣高懸如道院人言幕府最清嚴
印封不動坐終日滿樹梅花雨一簾

閩城歲暮

嶺南春早不見雪臘月街頭聽賣花
海國人家除夕近滿城微雨濕山茶

經歷司暮春即事

隔樹幽禽送好音
沉沉幕府似雲林
小盆幾箇山茶落
桃葉滿簾春雨深

又

霞飛海燕拂簾過
風捲魚鱗剪綠波
閒倚石闌數春事
滿池紅雨落花多

贈道士陳華隱

早年濯足東海水
去卧華峯頂上雲
收得九秋仙掌露
歸來酌獻武夷君

題淮安王氏小樓

并引

呂山王氏小樓獨占淮安一勝予嘗以迎餞至
此登斯樓漫成四絕模寫其槩後之來者其興
無窮

江水粼粼鴨綠新江頭日日送行人南來北去年年事
岸草汀花自在春

又

拂曉樓牕一半開樓前昨夜浪如雷滿江梅雨風吹散

無數青山渡水來

又

江月滿樓江水澄
胡牀據坐憶吾曾
解吟如練澄江句
未信玄暉獨擅能

又

雪滿寒江壓酒旗
江南無處不堪題
小舟載得梅花去
渡領春風過水西

題畫竹

小雨春池濕鳳毛天孫深夜織鮫綃何人更立湘江水
獨倚薰風憶舜韶

彭城雜詠呈廉公亮僉事

亞父塚前春草齊楚王城上夕陽低黃鶯不解興亡事
飛過海棠枝上啼

又

城下黃河去不回四山依舊畫屏開無人念得登臨意
獨上將軍戲馬臺

又

雪白楊花拍馬頭行人春盡過徐州夜深一片城頭月

曾照張良案上籌

又

何處春風燕子樓斷碑落日古城頭畫眉人遠繁華歇
無數遠山生暮愁

又

歌扇搖風喫酒香舞裙今日動鵝黃柳邊今夜孤舟發

水遠山遙空斷腸

寒食馬上

道傍楊柳已栖鴉幾度春深未到家
城北城南千樹雪行人馬上看梨花

燕京作

落月西牕聞禁鐘夢回遠客立雲龍
江南飛盡千株雪辜負梅花過一冬

奎章閣感興

奎章三月文書靜花落春深鎖閣門玉座不移天步遠
石碑空有御書存

又

花落春深似去年無人再到閣門前當時濟濟誇多士
爭進文章乞賜錢

京城立春

燕姬白馬青絲纆短衣窄袖銀鞵光御溝飲馬不回首
貪看柳花飛過牆

九日遇雨

佳期不負到重陽
細雨濃陰又可傷
試問東籬何處賞
有花無酒惱人腸

客中九日

寥落天涯歲月賒
每逢佳節苦思家
無錢沽得隣家酒
不敢開牕看菊花

又

佳節相逢作遠商
菊花不異故人鄉
無錢沽得隣家酒

一度孤吟一斷腸

雪中妃子

梁王宴罷下瑤臺
窄窄紅靴步雪來
疑是陽和三月暮
楊花飛處牡丹開

初夏淮安道中

魚蝦鱗鱗初出網
梅杏青青已著枝
幾樹棠花初著雨
行人四月過淮時

過石子岡

霞光日落紅穿樹山色雨餘青近人便好拂衣入山去
解鞍辭却馬頭塵

次王叔能侍御史

龍蛇偃蹇出牆陰五色春雲態度深臺閣文章散清氣
月明山館夜蕭森

醉起

楊柳樓心月滿牀錦屏繡褥夜生香不知門外春多少
自起移燈照海棠

宮詞

駿馬驕嘶嬾著鞭
晚涼騎過御樓前
宮娥不識中書令
借問誰家美少年

衰柳

清涼亭上幾株柳
霜夜涼風下夕陽
依舊明年二三月
小金山上看鶯黃

戲友人

毘陵公子醉醺醺
白面迎風向酒痕
幾度小紅樓上月

有人銀燭掩重門

宴回

兩行老柏參天翠銀燭青驄御史回
深夜酒闌人散後
獨留明月照霜臺

約友遊西峰不至

仙人約我峰頭去
欲去峰頭看白雲
一夜白雲峰下宿
曉來散作雨紛紛

太平驛即事

驛鼓高懸使者稀
溪雲斷續樹參差
日斜山畔無人語
獨立西風數桂枝

過光孝寺

秋日留題翠壁層
出山聊近在山僧
肩輿又上沙頭渡
隔水人家兩岸燈

臨丹青閣

飄然身在紫芝峰
翠壁丹崖有路通
傑閣凌煙欲飛去
亂山無數夕陽中

黃河

斗杓照水半垂天
水氣漲天如白烟
南北櫓聲爭上下
月中聞鼓避官船

沛尉蔣景山沛簿趙伯顏送予金溝月夜別去有懷

公子將軍兩少年
繡衣白馬杏花天
醉中送客歸城暮
回首金溝月滿船

次繁昌邑宰梅雙溪韻

嬰鑠繁昌宰曾充觀國賓儒冠猶破帽禮服尚垂紳澹
泊心無愧清癯目有神老隨朱紱貴驚見白頭新撫字
三年政歌謠百里民

題進士索士岩詩卷士岩與余同榜又同為燕南
官由翰林編修為御史臺掾兼經筵檢討除為燕
南廉訪經歷

憶昔登天府文華萃帝鄉俊才魚貫列多士雁成行寶
劍懸秋水驪珠耿夜光三場如拾芥一箭已穿楊上策

師周孔蜚聲陋漢唐鳳池開御宴虎榜出宮牆賜笏丘
山重恩袍雨露香天花皆剪翠法酒盡封黃冠蓋遊三
日聲名滿四方歷階超宰輔捧表謝君王第甲分三館
鐫碑立上庠曲江嘉宴會合席盡才良契誼同昆弟比
和鼓瑟簧誓辭猶在耳離思各驚腸臺閣需材器儒
林作棟梁超遷烏府掾輝映繡衣郎迫晏封幾事平明
出奏章日披墳典舊時念簿書忙檢討超經幄論思近
御牀聖朝稽古道日暮下迴廊羈旅燃薪桂長吟出錦

坊弱妻貧且病羸馬瘦仍僵窮巷迴車轍空廚泛酒漿
故人傳奏目請便趣行裝皇極三臺重燕南各道昌承
恩辭魏闕攬轡去恒陽曉幙芙蓉露秋空柏樹霜諸司
循直矢羣吏肅宏綱漢水浮神馬岐山出鳳凰行須冠
獬豸已見走豺狼慚愧蓬蒿翼乘風亦下翔

送丁太初赴永嘉學正十八韻

國學崇儒代人材絕妙年風雲千里駿日月九重天翰
苑司掄選中書屬次銓光榮毛義檄奮發祖生鞭學廣

儒官制書傳子弟員宦情依冷椽官舍擁寒櫓筮仕無
踰此如君更穎然永嘉今永郡多藝風多賢咨訪兼留
意英髦孰接肩舊家疑寂寞遺業想流傳會看聲華盛
應知德業全高情何特達矇目共周旋春著花間屐秋
乘柳下船篇章微點染山水自清妍薦豆登霜柚充廚
載海鮮洞簫吹月下玉樹立風前已作魚龍變何嫌雨
露偏羣公爭薦進拭目著騰騫

雁門集卷三

欽定四庫全書

雁門集卷四

元薩都拉撰

過洪

奔流激長川百折怒未已
長年與水爭退尺進纔咫
艱哉力舟子觀可悟至理

和韻題石城峭壁

離宮長蓬蒿畫棟落花綵
翠華不復遊空餘石城

在馬蹄踏雲霞鳥聲隔烟靄老僧喜客來山中深
似海

偕楊善卿丘以敬劉載民遊法雲寺以色即是空
分韻得即字

駕言招提遊繫馬日之夕黍酒濃滴珠松風暗籠漆朝
士晝鳴珂山僧夜飛錫鳳臺錦袍人可望不可即

病中寄即休上人

牀頭藥裏列門外芳草榮庭閒午陰轉睡覺餘香清曹

吏日三謁幽鳥時一鳴豈不好馳逐但恐勞吾生

經姑蘇與張天雨楊廉夫鄭明德陳敬初同遊虎

丘山次東坡舊題韻

孤峯峙平疇松杉夾飛嶺古劒池獨竒兩壁插天井
疑將軍拜靈泉奔老耿深惟著蛟螭淨莫容蚪鼉昔試
盤陀鋒斬斲尋尺礦兆瘞銀鳧多氣結金虎猛至今王
霸業堪笑未全騁何如吾同遊俯仰無少哽小吳不滿
目坐覽三萬頃風高塔鈴語日昃蘿衣冷香積餉醍醐

法喜得雋永嗟嗟蛾眉僂嘗來弄光景蹤跡留雪泥宇
宙寄泡影九京倘可作當為折簡請

立秋登烏石山和幕府楊子承韻

海國山四圍繁華坐消歇樓觀沉夕陽鴻雁下秋色水
邊無麗人石上存古刻感此莫歸遲秋露滿山白

車簇簇

李陵臺西車簇簇行人夜向灤河宿隣家美酒斗十
十下馬飲者不計錢青旗搖搖出華表滿堂醉客俱

年少捧盃小女歌竹枝衣上翠金光陸離細肋沙羊
成體薦共訝高門食三縣白髮從官珥筆行毳袍衝
雨桓州城

白翎雀

淒淒幽雀雙白翎飛飛只傍烏桓城平沙無樹巢弗營
雌雄為樂相和鳴君不見舊日輕盈舞紫燕鴛鴦鎖老
昭陽殿風暄芍藥春可憐露冷芙蓉秋莫怨

凌波曲

吳蠶入繭雙鴛綺繡縷團花金鳳尾昔時啼艷曉粧慵
滿眼春嬌扶不起昔時解帶羅襪鬆玉尖微露生春紅
翩翩白練輕舒卷筇籜初翻宮樣軟三尺春雲入手輕
一鈎新月凌波淺象牀舞罷嬌無力雁沙踏破參差跡
金蓮窄小不堪行獨倚東風玉堦立

吳姬曲

皎皎紅羅幕高高碧雲樓娟娟一美人炯炯露雙眸郎
居柳浦頭妾住鶴沙尾好風吹花來同泛春江水

洞房曲和劉致中員外作

峭寒暗襲雲藍綺
蛟帳悵悵夜如水
美人骨醉紅玉軟
滿眼春酣不忺起
幽禽關關喚霜曙
金壁屠蘇溢香霧
有生只合老溫柔
璧月長教掛瑤樹
鴛鴦同心暗中結
滿意芳蘭煖紅雪
癡雲駢雨自年年
不管人間有離別

漢宮早春曲

女夷鼓吹招搖東
羲和馭日騎蒼龍
金環寶勝曉翠濃
梅花飛入壽陽宮
壽陽宮中鎖香霧
滿面春風吹不去

鞭却靈輦駕五山芙蓉夜暖光闌干鷄人一唱曉星起
四埜天開春萬里

新夏曲

紅泣香枯怨流水夜放籜龍千尺尾風生宮樹曉層層
涼綠一簾收不起烟乾寶鴨白晝清祝融緩轡行且停
薔薇花深霧冥冥碧窓睡起香滿肱

醉歌行

草生金谷韓信餓古來不獨詩人窮今朝有酒且共醉

明日一飲由天公紅樓弟子年二十飲酒食肉書不識
嗟予識字事轉多家口相煎百憂集迺知聰明能悞身
不如愚魯全天真百年簡憲曾何畏一日禮法能殺人
賢愚千載同一朽我為君歌君拍手流芳遣興不必論
且盡樽前一壺酒

鬻女謡

揚州嫋嫋紅樓女玉笋銀箏響風雨繡衣貂帽白面郎
七寶雕籠呼翠羽冷官傲兀蘇與黃提筆鼓叻趨文場

平生睥睨紈袴習不入歌舞春風鄉道逢彌女棄如土
慘淡悲風起天宇荒村白日逢野狐破屋黃昏聞嘯鬼
閉門愛惜冰雪膚春風繡出花六銖人誇顏色重金璧
今日饑餓啼長途悲啼淚盡黃河乾縣官縣官何爾顏
金帶紫衣郡太守醉飽不問民食艱傳聞關陝尤可憂
旱荒不獨東南州枯魚吐沫澤雁叫嗷嗷待食何時休
漢宮有女出天然青鳥飛下神書傳芙蓉帳暖春雲曉
玉樓梳洗銀魚懸承恩又上紫雲車那知鬻女長歎歎

願逢昭代民富腴兒童拍手歌康衢

練湖曲

練湖七月涼雨通白水蕩蕩芙蓉紅芙蓉紅盡早霜下
鴛鴦飛去何匆匆茜塘女兒弄輕碧鳴榔聲斷無消息
清波小藻出銀魚落日吳山秋欲滴望湖樓上雲茫茫
鳥飛不盡青天長丹陽使者坐白日小吏開麗宮酒香
倚闌半醉風吹醒萬頃湖光落天影掛冠何日老江南
短褐綸巾上魚艇

終南進士行和李五峯題馬麟畫鍾馗圖

老日無光霹靂死玉殿咻咻叫陰鬼赤脚行天踏龍尾
偷得紅蓮出秋水終南進士髮指冠綠袍束帶烏靴寬
赤口淋漓吞鬼肝銅聲剝剝秋風酸大鬼跳梁小鬼哭
豬龍饑嚼黃金屋至今怒氣猶未消髯戟參差努雙目

桃源行題趙仲穆畫

長城遠築阿房起黔首驅除若螻蟻誰知別有小乾坤
藏在桃花白雲裏桃花重重開白雲洞門鎖住千年春

男耕女織作生業
版籍不是秦家民
桑麻雞犬村村屋
流水門牆映花竹
無端漁父綠蓑衣
帶得黃塵入幽谷
主人迎客坐茅堂
共話山中日月長
但見花開又花落
豈知世上誰興亡
明朝漁父歸城市
回首雲山若千里
再來何處覓仙蹤
恨滿桃花一溪水

回風波弔孔明先生

大江東流日夜白
已矣英雄不堪說
朔風挾雨過江來
猶向磯頭濺腥血
漢家神氣四海搖
奸雄賊子相貪鬻

二龍雌雄尚未決將軍戰骨如山高先生謀畧滿懷抱
坐視狂塵不為掃若非蜀主三顧賢終只如龍卧南畝
仰天一出摧奸鋒綸巾羽扇生清風許君義氣肝膽裂
兵樞盡在掌握中赤壁樓船滿江夏伏劒登壇唯叱咤
忠心耿耿天必從烈火回風山亦赭可憐一炬功未成
將星已墜西南營力吹漢水灰未醒嗚呼天命何不平
佇立磯頭盼吳越感慨令人生白髮先生雖死遺表存
大義晶晶明日月

送王循伯御史赴廣東僉憲時僕將回燕京

沙頭酒盡惜別離江波日色浮綉衣清溪柳花白蕩蕩
白下柳樹青依依秋雲雙驄嶺表去明月一雁燕南飛
曲江水發願相憶莫遣鯉魚音信稀

高郵阻風

離家十日得順風不卸蒲帆一千里忽然今日風打頭
寸波寸水逆上流小兒造物不可惻昨日南風今日北
黃郎束手篷下眠盡日閒看順水船順船得勢如馬走

相望招呼不回首長風破浪我亦曾順逆偶爾非人能
清明遊鶴林寺

青青楊柳啼乳鴉滿山爛開紅白花小橋流水過古寺
竹籬茅舍通人家潮聲捲浪落松頂騎鶴少年酒初醒
若將何物賞清明且伴山僧煮新茗

題茅山梅石道士卷

華陽洞裏羅浮仙袖攜冰雪梅花篇玉堂道士字一尺
紫清老人詩四聯夫何題詠到疎懶日短天寒歲云晚

獨憐空谷有佳人，翠壁丹崖作屏板。
道人鶴氅顛倒披，芒鞋踏雪夜深歸。
莫將鐵笛山頭吹，只恐石裂梅花飛。
北上別鄭文學

朔風吹散鴻雁羣，郎君上馬氣如雲。
繞街鞭影拂河漢，毳袍貂帽文將軍。
扶桑日出馬上見，金鷄一聲天下聞。
青燈細雨坐官舍，遙憶江南鄭廣文。

為姑蘇陳子平題山居圖黃公望作

塵途宦遊廿年餘，每逢花月滿幽居。
烟蘿犖确走麋鹿，

雲壑窈窕通樵漁那如隱君不出戶讀盡萬卷人間書
有生穹壤貴自攄布韋軒冕奚錙銖便當買山賦歸歟
石田老我扶犁鉏

揚帆松江甚駛西望吳山快而有作

秋風秋水清浮波片颿送舟如擲梭篙師絕叫鳬雁起
但見流沫翔盤渦汀蘆雪舞花婆娑淥淨已消菱與荷
青山蹠蹻奔青驪倏忽過眼千羣多放情盍買鱸鄉鱸
侑以滿酌金巨羅醉拍銅斗踏浪歌江行之樂其如何

中秋前二夜步至吳江垂虹橋盥漱湖渚而歸倚
蓬望月清興翛然因成數語

萬頃太湖風浪靜
玻瓈倒浸虹蜺影
灩灩露滴金波流
一筇獨立秋雲冷
步回長嘯倚蓬窓
月華正在青雲頂
和韻三茆山呈張伯雨外史

碧桃花落蓬萊宮
銀屏甲帳圍春風
冰簾捲水玉堂靜
白露滴月銀牀空
仙人夜酌九霞酒
手握北斗傾尊中
梧枝落影鳳凰語
幽韻彷彿臨蒼穹
伐毛洗髓天地老

火鼎夜出芙蓉紅呼龍洞口種瑶草採藥忽遇松間童
茆君自騎一虎去猶聞珂珮聲丁東武華山人三載別
綠袍赤杖蒼髯翁淮南江上復相見落日淡淡天無窮
明朝稽首渡江去楚水清淺銀河通

再泊釣臺次鮮于伯機韻

富春山下桐江渡今古舟車南北路敢將一片利名心
重宿高人釣遊處客星去後無人住蒼山白水還朝暮
沙鷗也解避紅塵見人飛上滄洲去

秋江泛棹琴樂圖

抱琴船頭為誰鼓滿江秋色荻花浦神魚出聽棹尾舞
曲中鴻雁起江滸帝子降兮木葉下_叶

題蜀山驛

荒山孤館靜老樹凍雲低馬識來時路詩存舊日
題郵亭一尊酒客枕五更雞到曉征鞍發村村雪
漲溪

宿因勝莊

薄莫雨初作客愁行路難長風吹短髮平地走驚湍雲
氣千山暝松聲五月寒小窓僧話久亦學坐蒲團
竹院亦幽雅參禪愧未能夢回僧枕雨花落佛龕燈未
響過牆竹窓搖掛樹藤裁詩題素壁聊爾記吾曾

宿龍潭寺

客路青山下僧庵綠水邊撞鐘驚鳥宿洗鉢動龍眠未
有林泉趣先尋粥飯緣上人喜留客夜雨佛燈前
次龍潭壁間韻憶新之區謙二臺節

故人久不見，悵望思遲留。
客路愁山虎，漁燈散渚鷗。
清歌聞越調，小艇入淮流。
江市雖蕭索，人家酒可謀。

勤勞賢使者，官馬未曾閒。
夜醉誰家酒，曉行何處山。
莫雲留客住，落日望君還。
相憶尋詩處，波濤洶湧間。

江館寫事

曉市人煙合，歸帆帶夕陽。
青山到江盡，白鳥去天長。
越女能淮語，吳姬學楚粧。
栖遲未歸客，猶著錦衣裳。

謝龍江虛白上人雨中見過

山僧入城市歸路晚沉沉雨濕緇衣重燈明黑樹深泥
途信行脚粥鼓急歸心應到松窓下新詩剪燭吟

用韻寄龍江

之子金山去梅天霧氣沉海風吹浪急江雨入樓深火
盡無茶味更長過燭心明朝好晴色應是寄新吟

鐵塔寺寫懷

蕭條治城寺杖屨日登臨古木涼風急空山落葉深夜
燈明鐵塔秋雨暗松林衲子清遊處閒來獨自吟

漫興

去歲干戈險今年蝗旱憂關西歸戰馬海內賣耕牛元
老知誰在孤臣為爾愁西風吹短髮落日倦登樓

賀陰君錫封贈

奕世陰家子居官邁等倫妙年全至孝餘祿養慈親致
敬歸榮早推恩勅署新綵衣映萱草日日北堂春

夏日遊鶴林寺

病餘乘野興來扣了翁房竹笋迸出地花枝垂過牆雨

聲鳴客枕雲氣暗僧堂歸路馬啼滑風吹酒面涼

賀丘郡博持敬新修鎮江儒學

孔門新壯觀化雨過南徐紫殿風鳴鐸青燈夜讀書杏
壇翔彩鳳芹沼躍銀魚館下諸生意如遊小石渠

花山寺投壺

落日花山寺秋風鐵甕城野人歡訟簡稚子說官清繫
馬巖花落投壺山鳥驚興闌山下路相送晚鐘鳴

次韻答奎章虞閣老伯生見寄

袞職須公稱江波屬我閒
宦情魚鳥畔德譽董韓間
黃閣論思地金焦放浪山
儘操舟泛泛空憶珮珊珊

病中書懷二首

半日閉門坐蕭然遠俗氛
病中心似水門外馬如雲
練杵搗寒月香爐生晝薰
興來覽明鏡太瘦小參軍

欲向江湖去何年理釣蓑
城山入樓近隣竹過墻多
春甕浮紅酒晴天戲白鷺
閉門且消病俗更莫相過

病中寄了上人二首

鶴林四月路佳景集芳辰花落石橋水鳥啼山樹春吟
歸山似畫醉卧草如茵衲子清遊處何妨問病人
日長草木茂古寺樂芳辰野衲歸時晚山泉滴夜春清
吟聯石鼎病酒吐車茵不是天涯客林泉一故人

憶鶴林即休翁

城南鶴林寺幽境脫塵煩地僻藤花落窓虛貝葉翻池
塘浮野鴨竹樹掛山猿病起借禪榻高眠避市喧

登山亭

山上新亭好紅塵不可侵雨堦幽草合風徑落花深野
水浮晴色平田下夕陰城中公子少日日就登臨

送人之金陵

之子金陵去黃梅細雨天晚鐘近蕭寺野水急吳泉枕
有思家夢囊無買酒錢鳳臺動詩興落筆授蠻牋

題高秋泉詩卷

美矣高夫子能文武亦全橫琴彈夜月洗劒動秋泉酒
熟春如海詩閒日似年綸巾北窓下倦可枕書眠

野潛堂

高隱有深意情閒直萬金
溪魚鮮作鱠竹笋長成林
鶴有還巢夢雲無出岫心
讀書風雨夜燈火野堂深

題朱澤民畫雪谷曉行

茆店衝寒出永厓拂曙來
蹬危留虎跡蘿密隱猿哀
行李一擔重疎梅幾樹開
陽鳥在何處不照雪盈腮

秋暮過吳值雨感懷

長嘯拂吳鈞蓬窓起白鷗
江山同逆旅風雨忽窮秋
樂

笑陶潛酒高哉范蠡舟一替吾有雪道路尚悠悠

道中風雨

野水池塘滿泥塗愁問程小車衝雨去曲路遶山行恁
地沾衣冷誰家壓酒聲飄零江海客汲汲事南征

初到閩

舊說榕鄉好來遊鬢已絲片雲山對戶一雨水平
塢綠袖持蕉葉丹林壓荔枝城閩南有市燈火夜
眠遲

春遊

明日城東看杏花
叮嚀童子早將車
路從丹鳳樓前過
酒向金魚館裏賒
綠水滿溝生杜若
暖雲將雨濕泥沙
絕勝羊傅襄陽道
車騎西風擁鼓笳

春日侍駕遊香山

馬上遊人隔苑牆
天家未肯縱春陽
輕寒輕暖鳥聲轉
無雨無風花命長
香殿雲烟隨鳳輦
交旂日月耀龍章
三三節近晴光穩
滿進虞廷萬歲觴

寓昇龍觀時吳宗師持旨先駕至大都度灣川遂
次韻賦此以寄并東順咨先生

扈蹕千官取次行道入先踏雪泥晴關南日暖龍顏近
嶺北風高鶴背輕丞相早行霜滑馬將軍夜宿火連營
一年兩度經過處惟有青山管送迎

送南安鎮撫趙南山捧表西省

平生尺劒衆中師臣子肝腸天地知少壯金戈探虎穴
太平鎧甲網蛛絲青衫白髮尊前酒紫塞黃雲馬上詩

今日又隨天表去
梅花香裏立沙墀

過李陵墓

降入天驕愧將才
山頭空築望鄉臺
蘇郎有節毛皆落
漢主無恩使不來
青草戰場雕影沒
黃沙鼓角雁聲哀
那堪攜手河梁別
淚洒西風骨已灰

擬李陵送蘇武

同是肝腸十九年
河梁攜手淚潸然
鐵衣骨朽埋沙磧
白首君歸弃雪氊
海北牧羊無夢到
上林過雁有書傳

漢家恩愛君須厚剪紙招魂望塞邊

黃河夜送西臺御史張子壽時新除湖廣僉憲

愛君足跡半天下白簡清霜秋氣多
帆影東南湖上去馬蹄西北日邊過
風波玉露仙人掌文彩雲機織女梭
自笑追隨遠遊客斗槎星夜下黃河

黃河夜雨懷元顏子方

風流俊逸四公子輕帽短衣過魯城
紫陌東風聞戲馬綠窓明月醉聞鶯
櫻桃花下春中酒沉水香回夜按箏

獨有黃河千里客短篷聽雨到天明

題高唐驛

三尺高唐帝子墳東風吹草綠
法官中子母生前別天上簫韶夢裏聞
日暮白楊飛亂雪夜深黑氣結愁雲
小臣泣血應無補留與他年太史云

過廣陵驛

秋風江上芙蓉老
堦下數株黃菊鮮
落葉正飛揚子渡
行人又上廣陵船
寒砧萬戶月如水
老雁一聲霜滿天

自笑棲遲淮海客十年心事一燈前

送王御史時巡歷河道解舟金陵

淮南雨過好晴色御史樓船動楚橈楊柳清風秋解纜
瓊花明月夜聞簫卧聽天上銀河浪夢到雲邊白玉橋

遊鐵塔寺

江南地僻繁華盛古寺巍然鐵塔存金屋月梅橫夜雨
銅駝露草泣秋原六朝王氣人何在幾度悲風鈴自喧
尚有他年舊時字摩挲一半沒苔痕

送外舅慎翁之燕京

楊子江頭柳色濃，小船春雨去忡忡。
青袍鐵甕龍門婿，紫錦蒲帆鶴髮翁。
晉府舊臣還塞北，星門嬌客卧牀東。
明年亦是燕山客，騎馬天街踏軟紅。

春日登北固多景樓錄奉即休長老

東風吹樹散晴嵐，獨上層樓酒半酣。
拍岸潮聲來海外，滿江山色入淮南。
當時霸主分三國，此日吳禪老一龕。
惟有樓前舊時柳，年年三月色如藍。

還京口

黃鶴山頭雪未消
行人歸計在今朝
城高鐵甕江山壯
地接金陵草木凋
北府市樓開舊酒
南朝官柳識歸橈
吏人莫見參軍面
水宿風食鬢髮焦

寄金山長老

老師召對金鑾殿
喜動龍顏坐賜茶
一日潮音起般若
九重春色上袈裟
高風已入三天竺
妙果重開五色花
渴想楊枝舊甘露
何時一到病人家

臘盡過練湖

獨倚牙樯數客程殘年風景足鄉情寒天半夜無人語
明月滿船聞雁聲雲外好山如有約烟中野樹不知名
明朝烏鵲橋頭聞應是人家出戶迎

丹陽普寧寺席上

紅白桃花開滿枝滿城微雨牡丹時因過古寺逢僧話
莫遣扁舟解纜遲客裏逢春多病酒江南到處半題詩
山川總是曾遊處一曲琵琶寫別離

送王郎還錢塘

王郎會我丹陽郭歸興錢塘不可留
北固雪晴山出畫西湖春動水明樓
草生湘浦行人遠日落吳山故國愁
安得與君二三月買花沽酒醉紅舟

宿玄洲精舍芝茵閣別張伯雨二首

一到茆山三日留滿山風雨過中秋
雲行松樹高低見日落澗水東西流
外史相邀登茵閣此身只合往瀛洲
它年叢桂結招隱楚服願隨麋鹿遊

竹樹忽聞乾鵲鳴
明朝歸計候新晴
小樓無處有秋意
暗雨空山如海聲
葉落窓虛開鶴步
峰回路合斷人行
誰知昨夜玄洲客
剪燭題詩過二更

登德興聚遠樓上有宋廟書

眉山仙去風流盡
聚遠樓空月色寒
波暖東風入尊俎
夜深北斗掛闌干
幽花野草先靈杳
鐵畫銀鈎御墨殘
不見舊時雙燕子
春風幾度捲簾看

九華山石墨驛

馬上行人思九華飄飄高興滿天涯排空峭石生玄笋
落日奇峯掛赤霞仙掌九秋傾露屑天河半夜礙星槎
雲中五老應招手呼我來遊太乙家

至龍潭驛

野草山花知姓字人生蹤跡似浮萍帆衝細雨空江白
鳥沒長淮遠樹青今夜故人離水驛明朝別酒盡沙瓶
匆匆又入丹陽去莫鼓晨鷄已候聽

登鳳凰臺

鳳凰臺上望長安五色宮袍照水寒彩筆千年留翰墨
銀河半夜掛闌干三山飛鳥江天暮六代離宮草樹殘
始信人生如一夢壯懷莫使酒盃乾

鳳凰臺懷古

鳳凰一去不復返竹實桐花空滿庭暮雨樓臺連楚寺
秋風鼓角動邊城水邊萬井吳煙白天外三山楚樹青
不見騎鯨李公子幾回惆悵此中行

次王本中燈夕觀梅

翠禽偷夢出南園
綽約冰姿傍綠尊
水鏡玉釵浮翠影
風簾銀燭照粧痕
粉香微酒無人見
素質多寒亦藉酒溫
不似海棠春睡去
西樓月落已黃昏

謝人惠木犀

霜高落葉如雨急
有客敲門送木犀
夜月不留藏兔影
秋風失却掛蟾枝
雲中仙子金華墜
天上吳生玉斧移
寄語鳳臺老居士
旋磨香露寫新詩

奉和鄧善之學士贈陳堯夫教授之作

巴西夫子鄧學士文彩珊珊玉珮琚天上已無金馬詔
人間空有白鵝書雲窓春透松花濕月殿秋高桂影疎
不見青山埋骨處水晶宮裏是幽居

過江東驛次王侍御韻

政事文章王侍御朱簾捲雨送將歸江東春色分銀篆
馬上清風吹繡衣澤國水香魚藻動硯池春暖墨花飛
至今吳楚經行處夜夜奎光繞太微

九日登石頭城

九日吟鞭聚石頭翠微高處倚晴秋
西風不定雁初度落木無邊江自流
兩眼欲窮天地觀一盃深護古今愁
烏臺賓主黃華宴未必龍山是勝遊

寄楚堂

憶昔相逢春莫天
道傍楊柳盡飛綿
池魚出水將三尺
竹笋成林又一年
高士已成招隱賦
行人未辦買山錢
楚堂燈火清秋夜
何日聯牀聽雨眠

寄同年友

憶昔同登龍虎榜思君一度一悽然三年歲月紅塵裏
萬里關河白雁前天上故人淮水隔江南老樹楚雲連
不堪回首知何處聞說年來海變田

寄茅山謝舜咨

昇龍觀裏謝道士一入茅山不肯回白髮笑人年百歲
青天容我日千盃已知聖主求方士未必先生下釣臺
每向石頭城下望順風應寄鶴書回

送王幼達之北京

五色雲烟百尺臺
王郎獨步近蓬萊
江湖水落魚龍上
天地秋高鴻雁來
北苑芙蓉風慘淡
西宮楊柳月徘徊
此行正及扶桑日
應獻堯庭萬壽盃

昇龍觀夜燒香印上有呂洞賓老樹精

蘭風吹動呂仙影
老樹槎牙吐暮秋
夜靜藥爐丹火現
月明神劍夜光浮
已知浩氣無窮盡
不到心灰未肯休
鐵笛一聲吹雪散
碧雲飛過岳陽樓

送湖洲鼓元明道士入茅山

道人居住碧湘灣
清夜月明搖珮環
出門倒拄九節杖
辭家却入三茅山
開籠放鶴橫江去
寫檄收龍帶雨還
便擬訪君吹鐵笛
青松白石往來間

送崔知印之江東

金陵市上多驄馬
白下橋頭喜識君
玉佩清搖烏府月
篆銀紅帶赤城雲
買舟又過江東去
離笛難禁柳外聞
獨有無媒送行者
依然野鶴在鷄羣

題先春卷上有蕭滕王三學士贊

番陽山人春擁門玉堂學士墨翻盆屋前屋後雪千樹
枝北枝南月半痕寒夜老龍搖玉骨霜天瘦鶴弔冰魂
未經調鼎休惆悵會見留酸到子孫

寒夜即事次韻呈許榮達

呵筆題詩逸興舒翠簾寒重捲鰕鬚春分采石仙人酒
夜讀茅山道士書箭刻未移寒漏淺江聲漸少夜潮枯
閉門歲晚仍多事歸夢無端遶故廬

鶴骨笛

九臯聲斷楚天秋，玉頂丹砂一夕休。
楊柳肯忘枯朽恨，梅花吹盡古今愁。
魂歸遼海身如蜨，曲破江城月滿樓。
惆悵玉人三弄罷，杳無消息到揚州。

天燈

高掛長繩百尺餘，直飛紅燄上天衢。
一包春髓蒸元氣，九轉靈丹煉太虛。
綵鳳抱成吞日卵，赤龍銜出照天珠。
高高不受飛蛾撲，長使凡人仰面吁。

贈欽師

隨緣駐瓶錫頂雪已差差莫道禪非學心空不
廢詩

畫二首

樹色濃堪掬癡嵐撲雨秋道人巖下住屋角掛
奔流

草迷蒼耳子烏弄白頭翁十里湖山樹平分杳靄中
和閒閒吳真人二首

幾度驅車上京國五更歸夢遶雲林丹爐火伏虎晝卧

石鉢雲寒龍夜吟

天上神仙吳子晉丹鳳樓前駕鹿車紅門下馬見天子
袖有一卷養生書

興聖寺即事三首

宮塔白日杏花落深院朱簾燕子飛回首人間春又老
將軍白馬幾時歸

御廚香動晚分羹七寶玻璃拌承白面內官呼小字
隔簾傳旨賜中丞

二月深宮花似錦
柳絲垂地怯風吹
御堦春水多三尺
丞相遊湖太液池

遊會仙宮

霏霏涼露濕瑤臺
半夜吹簫月下來
山外春風將雨過
滿庭撩亂碧桃開

題范陽驛

長路風寒酒力醒
馬頭歲月短長亭
凍雲欲雪風吹散
望出西山一半青

道傍萱花

萱草花開山路頭
內家景致落林丘
風塵不改好顏色
應與行人消百愁

書澮溝楊氏壁二首

故人家在河邊住
吏部書從天上來
愧我掛冠歸去晚
柳花飛盡棟花開

楊柳人家春晝長
落花庭院燕飛忙
買魚沽酒黃河上
傲殺南風三月強

彭城雜詠

英雄去盡山河在城郭荒涼草樹迷過客無心弔千古
落花風雨聽鶯啼

夜過白馬湖

春水滿湖蘆葦青鯉魚吹浪水風醒
舟行未見初更月
一點漁燈落遠汀

高郵至邵伯二首

移棹偏驚臨水雁
過淮時買出罾魚
有時得句無人
和

風雨寒窓夜讀書

幾度秋深未到家
滿湖開遍水紅花
遠人日日頻中酒
明月扁舟索買瓜

題淮東王廉訪清涼亭

主人曾次洗冰雪
深夜金山月湧波
二十四橋秋水白
淮南八月瀉銀河

次和清涼寺長老韻

緇衣送酒一壺冰
霜蒂懸香九月橙
酌酒破橙天色晚

桂花樹下出銀燈

秋江橫笛圖為維揚蘇天爵題

楓葉高低山遠近
月明霜薄楚江澄
何人吹笛孤舟外
莫是蘇仙過廣陵

過江後書寄成居竹

揚州酒力四十里
睡到瓜洲始渡江
忽被江風吹酒醒
海門飛雁不成行

楊子江送同志

衮衮諸公立要津一波纔動總精神滿江風浪晚來急
誰似中流砥柱人

夜發龍潭二首

孤舟一夜發龍湫水逆風回上石頭暫泊沙洲過夜半
臥聽鐘鼓是昇州

船頭夜靜天如水渡口潮平月在江燈影搖波風不定
老龍吹浪濕蓬窓

江浦夜泊

千里長江浦月明星河半入石頭城棹歌未斷西風起
兩岸菰蒲雜雨聲

金陵道中遇雨寄功父光國五首

出城便喜風景好淡水穿沙生細鱗多謝山雲飛白雨
應教行客洗紅塵

平生夢想金陵道此日偶然身自來應是山雲喜詩客
野花滿路雨中開

夾道長松風聒聒滿溝亂石水泠泠斷雲銜雨溪南去

失却長山一半青

騎馬何人衝白雨乘興有客看青山出城自謂身無事
衝雨看山未是閒

夢想江南今日到肩輿過處落花風行人五月金陵道
石竹花開白雨中

寓臺城寄吳宗師

金陵城外鳳凰臺夜夜吹簫獨自來不見仙人倚歌和
白鶴飛下還飛回

雪中飲昇龍觀

銀燭春船剪夜寒道人鶴氅紫霞冠
山瓢未盡金陵酒玉樹飛花滿石壇

和王本中直臺書事

百尺臺中誰夜直西廊斜月照東廊
五更夢覺春寒甚簾外梨花滿樹霜

今日短衣鞭瘦馬每慚同輩說登科
近曾夜直南臺上學得吳兒白苧歌

昇龍觀九日海棠杏花開二首

九日江南風日暖
海棠花間杏花開
昇龍觀裏春光早
為是先承雨露來

鼎湖龍去御牀空
輦路花開舊日紅
九日人間春色早
不堪草木見秋風

贈彈箏者

銀甲彈冰五十絃
海門風急雁行偏
故人清怨知多少
揚子江頭月滿船

寄諸臺掾二首

天上霜臺聳百尋
諸郎不為簿書禁
遙知閒倚東廊柱
看盡楊花過綠陰

天上故人頻寄語
江南倦客只吟詩
梨花開盡東廊雪
又過梅黃杏熟時

贈謝舜咨羽士

揚子江頭春水動
三茅洞裏碧桃開
道人不管天南北
夜半月明騎鶴來

送武侍御朝章

楓林湛湛草斑斑
御史青驄鄉舊環
日暮酒醒人已去
不堪回首見青山

次程宗賜二首

一冬雨雪天涯客
千里雲山馬上詩
記得小紅樓畔夢
杏花春雨早寒時

揚州正月雨如絲
江上梅花已盡時
誰識能詩老何遜
曉寒明鏡撚吟髭

贈來復上人四首

北口雪深羶帳暖紫駝聲切夜思鹽上人起飲黃封酒
可勝醍醐乳酪酣

燕山風起急如箭馳馬蕭蕭苜蓿枯今日吾師應不念
毳袍衝雪過中都

手持一鉢走京華乞食王侯宰相家今日歸來如作夢
自鋤明月種梅花

五雲樓閣碧玲瓏口吐蓮花入紫宮十二珠簾捲秋月

霏霏涼露下梧桐

戲王功甫

王郎酒醒倚脩竹
雪後重簷擁毳衣
亦有江南未歸客
青山影裏馬如飛

戲贈王本中柳枝詞

日高燕語捲簾遲
獨倚東風看柳枝
三月柳花飛欲盡
遠人涼露未歸時

城南偶興二首

桃杏花開紅映人池塘水暖綠粼粼典衣沽酒入城去
報道江南二月春

斷橋芳草生舍路隔水楊花飛度城客裏不知春早晚
年年盃酒過清明

宿洞神宮春晚書事

道人睡起窓月白飯熟黃梁鷄亂啼門外賣花聲已過
街頭春雨竟成泥

冶城三月晦日

雨前雨後鶯亂啼城南城北花交飛江南兒女裁苧衣
燕京遊子何時歸

寄浙東鼎經歷

一片暮雲千里隔石頭城上望天台夜深嫠女明如鏡
雁蕩山前雁盡回

春日偶成二首

歸到江南纔一月短衣匹馬又京塵明朝擬下江東去
晴日柳花飛送人

水繞池塘朝飲馬
月明蒼栢夜鳴烏
年來南北幾千里
却笑書生無遠圖

春望

丹陽郭裏春濛濛
騎馬出郭詩思濃
江南二月風雨過
梅花開盡杏花紅

春暮

柳花撲簾春欲盡
綠陰滿窓鶯亂啼
祇愁明日送春去
風雨滿林聞竹鷄

端居書事答翟志道知事見寄韻二首

短褐詩人瘦十分平生不作送窮文
幾時結屋孤山下為覓梅花種白雲

瘦馬春城曙色分長年奔走愧移文
幾時黃鶴山房下松火茶鐺煮白雲

鎮江寄王本中臺掾

梅花落盡空吹笛正月半頭思遠人
兩岸好山青不斷一江微雨鷓鴣春

和友人招飲

山人開苑滿園香
短簡招呼白面郎
瘦馬踏泥春巷去
一林烟雨杏梅黃

寄即休翁三首

苔老應無屐齒痕
舊遊歷歷眼中存
秋深南國行人少
落葉蕭蕭滿寺門

北窓終日對竹坐
老却參軍不入城
秋逕山風多落葉
隔林疑是馬蹄聲

鶴林老子久不見應是山門長綠苔
幾日城南風雨過
村村無處不黃梅

未歸

白岩老子城中去
驄馬遊人寺裏來
城外風流城裏少
岩花落盡野花開

夏仲書景

堦前萱草花開盡
堂上主人消百憂
門外涼風吹樹急
江南五月似涼秋

病起戲筆奉荅御史王文休

江南倦客好清齋
煉得身形瘦似梅
不到清溪三四日
藕花無數水中開

偶成三首

買魚沽酒消長日
高樹清風燕子閒
却倚天南望天北
隔江青處是誰山

自許癡兒了公事
肯教俗子議清流
明日醉騎五花馬
吹簫踏月過揚州

疎簾日午花陰直高柳清風語燕閒
默坐焚香點周易
軟紅不到小屏山

層樓即事

浴罷焚香掃閣眠過牆新竹翠娟娟
半空雲氣層樓暗
四月江東欲雨天

納涼

桂枝葉密陰覆地
梔子花開香滿廊
古寺納涼過半日
葛衣石枕竹方牀

秋夜聞笛

何人吹笛秋風外
北固山前月色寒
亦有江南未歸客
徘徊終夜倚闌干

寄鶴林休上人

上人才思塞胷次
強欲禁之無不鳴
一日相望吐奇句
滿林光彩照山精

宿丹陽普照院

閉門三月聽秋雨
酒醒丹陽客未歸
明日新晴練湖去

藕花無數落紅衣

燈火僧房伴寂寥
小涼天氣入青袍
夜深為倚西廊柱
藥杵一聲秋月高

逢托克托景願

市酒瀉糟清似水
湖魚出網白如銀
買魚沽酒丹陽郭
落日江南逢故人

贈歌者號梅芳二首

露骨江南冰雪肌
斷腸塞上錦綳兒
春酸一點留無住

却是成陰結子時

玉骨冰清過歲寒可憐蜂蝶已成團如何不解相如渴
散盡江南一點酸

寓栖雲四首

一尊未盡有餘興二子不來無可人滿地鳳仙落紅雨
江南八月似殘春

盆池萬點浮萍草秋雨欲來無定蹤好是詩人漂泊態
丹陽郭裏夜聞鐘

瀟瀟風雨客心孤且盡尊前酒一壺
夜半酒醒愁又到一聲白雁下平湖

白面道人門不出晚涼倚樹聽秋風
最憐八月江南好老鴈叫雲霜葉紅

題隱上人房

練湖秋水霜眼碧坐對茅盈山色青
白日散花天女降夜深鐘磬尚聞經

寄金壇元魯宣差行操二年兄

蒼茫迴野凍雲低
馬上遙山玉四圍
自是詩人有清氣
出門千樹雪花飛

宿陵口寺

西風落葉陵口寺
薄暮鐘聲送夕陽
酒醒不知過夜半
開門滿地月如霜

題鄭谷驛

誰處江東鄭老家
自鋤谷口種烟霞
遠山三月多歸思
晴日東窓見杏花

贈張道士

道人新戴竹皮冠
頭上星搖北斗寒
一夜涼風吹髮亂
半窓鶴夢遶琅玕

題呂城葛觀二首

諸葛仙翁七十餘
呂蒙城下築幽居
來從方外求丹訣
且乞人間教子書

呂公城下葛仙家
洞府春深鎖暮霞
過客不知天畔月
小風吹落鳳仙花

延陵曲

延陵廟西落日低延陵廟前春草齊
千金公子去不返
淡雲苦竹斑鳩啼

宿延陵昌國寺書于上人房二首

舊日延陵客子家只今門巷滿桑麻
姑蘇回首神遊處
無限春風野薺花

東風吹水碧粼粼雨過村村野色新
小艇延陵廟前去
行花開盡野塘春

謝人惠茶

送茶將軍扣門急驚覺秋深夢一念半夜竹爐翻蟹眼
只疑風雨下湘江

題李薊丘畫松

平生恨不識遵道忽見此圖如夢間安得羲之九泉底
枯林風雨似初還

吳僧子庭古木竹

歲寒古木性所愛況有此君初附之江湖眼明世無幾

太息不生元祐時

和韻寄吳城陳敬初

吳江酒熟照行人
春江小雨波粼粼
一樽未盡忽晴日
江頭柳花撩亂春

席上次顧玉山韻

畫牆斑鳩啼綠樹
白日紫燕穿朱簾
晝長深院弄瑤瑟
吳姬十指行春纖

去吳留別于壽道陳子平諸友

吳堤楊柳雨霏霏四月猶寒總夾衣此去孤舟無好伴
空江惟見白鷗飛

一尊判袂闔閭城莫指青山管送行芳草綠波千萬里
不聞杜宇也傷情

季夏遊杭靈隱諸峯

佛國羣山快我登烟霞踏破幾層層三天竺畔全無暑
六月松陰尺五冰

秋日寓錢塘

小樓一榻錢塘客
況味淒涼序屬秋
安得江淹賦子筆
因而書作半生愁

青松林

一點兩點過雲雨
千株萬株臨路松
五月江南好風景
行人馬上不從容

宿經山寺二首

野人一宿經山寺
十里松聲半夜潮
何日掛冠尋舊隱
山中應有故人招

山中酒熟客初至正是東林月上時
痛飲不知過夜半
深山風露下松枝

題竹院壁

門外好山青入戶
堦前芳草綠侵簾
山僧應笑遊人醒
頭上花枝壓帽簷

書高賢坊

穿松翠滴青驄馬
過雨涼生白苧衣
三月已過四月半
柳花開盡棟花飛

常山紀行

綠陰門巷掩柴扉五月江南笋蕨肥
何處清香來馬上
滿山開遍野薔薇

山溜涓涓山雨晴村南村北鷓鴣鳴
行人五月不知倦
喜聽農家打麥聲

石羊華表草離離古木殘陽立斷碑
馬上不知何代塚
鷓鴣飛上野棠枝

石壁飛泉作雨聲野花滿路酒初醒
吾儂何事不歸去

一帶長山馬上青

羣婦攜筐入桑柘野猿抱子掛松蘿綠陰門巷客呼酒
黃犢山村人唱歌

過浦城

人家鷄犬隔癡嵐城郭微茫見塔尖一片輕雲籠馬首
熟梅時節雨纖纖


到閩二首

朔雪蠻烟總備嘗白頭纔到荔枝鄉浮雲不阻懷賢意

得掃寒蕪拜紫陽

潮水通城蜺蛤肥萬株紅荔豔晴暉
守臣只恐山飛去

高築闌閣鎖翠微



雁門集卷四